



Na osnovu člana 39. stav 1. Zakona o Visokom sudskom i tužilačkom vijeću Bosne i Hercegovine ("Službeni glasnik BiH", br. 25/04, 93/05, 48/07 i 15/08) i člana 12. Poslovnika Visokog sudskog i tužilačkog vijeća BiH ("Službeni glasnik BiH", br. 44/09, 28/10 i 58/10), Visoko sudsko i tužilačko vijeće Bosne i Hercegovine na sjednici održanoj 5. marta 2013. godine, usvojilo je

**PRAVILNIK  
O KVALIFIKACIONOM TESTIRANJU KANDIDATA ZA POZICIJE NOSILACA  
PRAVOSUDNIH FUNKCIJA U PRAVOSUĐU BOSNE I HERCEGOVINE**

**POGLAVLJE I. OPĆE ODREDBE**

**Član 1.  
(Predmet pravilnika)**

Ovim pravilnikom uređuje se postupak kvalifikacionog testiranja kandidata za pozicije nosilaca pravosudnih funkcija u pravosuđu BiH, oblasti iz kojih se vrši testiranje, struktura kvalifikacionog testa, te prava i obaveze kandidata u postupku kvalifikacionog testiranja.

**Član 2.  
(Pojam kvalifikacionog testiranja)**

Pod kvalifikacionim testiranjem kandidata za pozicije nosilaca pravosudnih funkcija u BiH podrazumijeva se testiranja kandidata iz oblasti utvrđenih ovim pravilnikom koje se provodi u elektronskoj ili štampanoj formi.

**Član 3.  
(Prioritetna forma testiranja)**

(1) Kvalifikaciono testiranje primarno se provodi u elektronskoj formi.

(2) Kvalifikaciono testiranje u štampanoj formi provodi se izuzetno, ukoliko ne postoje tehničke mogućnosti za provođenje kvalifikacionog testiranja u elektronskoj formi.

**Član 4.  
(Svrha kvalifikacionog testiranja)**

Kvalifikacionim testiranjem provjerava se stručnost kandidata koji se prijavljuju na pozicije nosilaca pravosudnih funkcija u pravosuđu Bosne i Hercegovine (u daljem tekstu: kandidati) u skladu sa kriterijima utvrđenim članom 43. Zakona o Visokom sudskom i tužilačkom vijeću Bosne i Hercegovine („Službeni glasnik BiH“, broj 25/04, 93/05, 48/07 i 15/08) (u daljem tekstu: Zakon o VSTV-u BiH).

**Član 5.  
(Obaveza kvalifikacionog testiranja)**

(1) Kvalifikaciono testiranje, u skladu sa ovim pravilnikom, je obavezno za kandidate koji se prijavljuju na pozicije nosilaca pravosudnih funkcija u pravosuđu Bosne i Hercegovine i to na:

- a) poziciju sudije i dodatnog sudije u općinskom/ osnovnom sudu,
- b) poziciju sudije i dodatnog sudije u okružnom privrednom sudu,
- c) poziciju tužioca u kantonalnom/okružnom tužilaštvu, Tužilaštvu Brčko Distrikta BiH i Specijalnom tužilaštvu Republike Srpske.

(2) Odluku o neprovođenju ili odgađanju kvalifikacionog testiranja u elektronskoj formi donosi Stalna komisija za provođenje postupka kvalifikacionog testiranja (u daljem tekstu: Stalna komisija) uz obavezno obrazloženje ovakve odluke.

(3) Odluka o odgađanju kvalifikacionog testiranja u elektronskoj formi donosi se u slučaju nastupanja okolnosti zbog kojih se testiranje ne može provesti u određenom terminu.

(4) Ukoliko ne postoji mogućnost za provođenje postupka kvalifikacionog testiranja u elektronskoj formi, Stalna komisija može donijeti odluku o provedbi testiranja u štampanoj formi.

#### **Član 6.**

##### **(Uvjeti za pristupanje kvalifikacionom testiranju)**

Kvalifikacioni test mogu polagati osobe koje ispunjavaju osnovne i posebne uvjete propisane Zakonom o VSTV-u BiH i drugim propisima za imenovanje na poziciju na koju se prijavljuju.

#### **Član 7.**

##### **(Oblasti iz kojih se provodi kvalifikacioni test)**

(1) Kvalifikacioni test obuhvata sljedeće oblasti:

- a) Krivično pravo,
- b) Krivično-procesno pravo,
- c) Građansko pravo,
- d) Građansko procesno pravo
- e) Privredno pravo,
- f) Evropska konvencija za zaštitu ljudskih prava i temeljnih sloboda i drugi međunarodni dokumenti, ugovori i sporazumi o ljudskim pravima čija je potpisnica Bosna i Hercegovina,
- g) Etički principi za obavljanje sudijske ili tužilačke dužnosti.

(2) Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) donosi katalog ispitnih oblasti koji sadrži pravne izvore po kojima se polaže kvalifikacioni test.

(3) Katalog ispitnih oblasti objavljuje se na web stranici VSTV BiH i na web portalu pravosudje.ba.

#### **Član 8.**

##### **(Opseg primjene)**

Kvalifikaciono testiranje provodi se za svaki javni konkurs koji je raspisan za pozicije navedene u članu 5. stav 1. ovog Pravilnika.

## **POGLAVLJE II. POSTUPAK KVALIFIKACIONOG TESTIRANJA**

#### **Član 9.**

##### **(Mjesto i način polaganja kvalifikacionog testa)**

(1) Kvalifikacioni test se polaže u sjedištu VSTV-a BiH u prostorijama koje se odrede za tu namjenu.

(2) Kvalifikacioni test u elektronskoj formi se polaže isključivo na mreži radnih stanica koje su pripremljene i administrirane od strane VSTV-a BiH i koje su uvezane sa jedinstvenim serverom za testiranje kandidata.

(3) Odjel za informaciono-komunikacione tehnologije Sekretarijata VSTV-a BiH (u daljem tekstu: Odjel za IKT) zadužen je za uspostavljanje i održavanje hardverske i softverske konfiguracije radnih stanica na kojima se vrši testiranje na način koji će omogućiti provođenje testiranja kandidata u skladu sa odredbama ovog pravilnika.

(4) Polaganje kvalifikacionog testa snimat će se audio-video sredstvima, ukoliko za to postoje tehničke mogućnosti.

#### **Član 10.**

##### **(Obavještenje o održavanju kvalifikacionog testa)**

(1) VSTV BiH putem Odjela za imenovanja Sekretarijata VSTV-a BiH (u daljem tekstu: Odjel za imenovanja) obavještava kandidate o održavanju kvalifikacionog testa najmanje deset dana prije održavanja kvalifikacionog testa.

(2) Obavještenje o održavanju kvalifikacionog testa objavljuje se na web stranici VSTV-a BiH i na web portalu pravosudje.ba, a kandidatima se dostavlja i putem elektronske pošte.

(3) Uz obavještenjem o održavanju kvalifikacionog testa kandidatima sa posebnim potrebama koji su podnijeli zahtjev za prilagođavanje ispitne tehnologije dostavlja se i odluka Stalne komisije o podnesenom zahtjevu.

(4) Svaki od prednje izloženih načina obavješćavanja smatrat će se urednim.

#### **Član 11.**

##### **(Sadržaj obavješćenja)**

(1) Obavješćenje o održavanju kvalifikacionog testa treba da sadrži listu kandidata koji se pozivaju na kvalifikacioni test, mjesto i vrijeme održavanja testa, u koje je vrijeme potrebno da kandidati dođu u prostorije VSTV-a BiH, te listu kandidata koji ne ispunjavaju zakonom utvrđene uvjete za imenovanje na poziciju.

(2) Obavješćenje iz stava 1. ovog člana objavljuje se na zaštićenom dijelu internet stranice Vijeća i dostupna je samo kandidatima koji su učestvovali u konkursnoj proceduri.

(3) Odluku o objavljivanju obavješćenja iz stava 1. ovog člana donosi Podvijeće za predlaganje kandidata najkasnije u roku od 15 dana od dana provjere pristiglih prijava.

(4) Ukoliko provjeru prijava kandidata vrše različita Podvijeća, odluka o objavljivanju obavješćenja iz stava 1. ovog člana donosi se nakon usaglašavanja Podvijeća o terminu održavanja kvalifikacionog testa.

#### **Član 12.**

##### **(Pristupanje kvalifikacionom testu)**

(1) Prije početka kvalifikacionog testa osoblje Odjela za imenovanja utvrđuje identitet kandidata koji je pristupio testu uvidom u identifikacioni dokument kandidata sa slikom, a što se također verificira i potpisom kandidata.

(2) Pod identifikacionim dokumentom iz stava 1. ovog člana smatra se važeća lična karta, vozačka dozvola ili pasoš koji su izdati od nadležnog organa Bosne i Hercegovine.

(3) Ako kandidat ne pristupi polaganju testa ili prije početka polaganja testa izjavi da odustaje od testa, odnosno ukoliko nije moguća identifikacija kandidata u smislu odredaba stava 2. ovog člana, smatrat će se da kandidat test nije polagao.

(4) Ako kandidat odustane od već započetog testa smatra će se da test nije položio.

(5) Kvalifikacioni test mogu polagati samo osobe sa liste kandidata objavljene u Obavještenju o održavanju kvalifikacionog testa.

### **Član 13. (Odobrenje za pristup testu)**

(1) Kandidat pristupa kvalifikacionom testu unošenjem automatski generirane identifikacione šifre koju mu dodjeljuje zaposlenik Odjela za imenovanja neposredno prije početka testa.

(2) Nakon unošenja identifikacione šifre za pristup testu zaposlenik Odjela za imenovanja provjerava tačnost podataka kandidata i unosi odgovarajuću šifru za verifikaciju. Nakon verifikacije podataka svih kandidata, zaposlenik Odjela za imenovanja označava početak testiranja.

(3) Identifikacionu šifru, koja se kandidatu dodjeljuje neposredno prije početka testa, kandidat je dužan čuvati. Identifikacionu šifru kandidat koristi za pregled rezultata testiranja.

### **Član 14. (Gubitak identifikacione šifre)**

(1) U slučaju gubitka identifikacione šifre iz člana 13. stav 1. ovog pravilnika, kandidat ima pravo da mu se identifikaciona šifra ponovo predoči.

(2) Identifikaciona šifra kandidatu se dostavlja na njegov pismeni zahtjev koji obavezno sadrži:

- a) ime i prezime kandidata,
- b) JMB kandidata,
- c) poziciju na koju je kandidat aplicirao,
- d) adresu stanovanja i e-mail adresu.

(3) Identifikaciona šifra kandidatu se dostavlja putem e-maila ili osobno u prostorijama VSTV-a, kojom prilikom je kandidat obavezan predočiti identifikacioni dokument.

(4) O dostavljanju identifikacione šifre kandidatu osobno sastavlja se službena zabilježba.

### **Član 15. (Kandidati sa posebnim potrebama)**

(1) Kandidati čije zdravstveno stanje zahtijeva posebne uvjete polaganja kvalifikacionog testa i prilagođavanje ispitne tehnologije dužni su uz prijavni materijal dostaviti i popunjen obrazac zahtjeva kojim traže posebne uvjete polaganja kvalifikacionog testa i prilagođavanje ispitne tehnologije u kojem je potrebno navesti sljedeće: razlog traženja prilagođavanja, prijedlog prilagođavanja ispitne tehnologije, precizno navesti popis teškoća ili otežavajućih stanja, uvjerenje nadležne medicinske ustanove koja sadrži nalaz i mišljenje ljekara i kojom se jasno pojašnjava historija bolesti, te o kakvim se posebnim potrebama radi.

(2) Stalna komisija odlučuje o zahtjevu za prilagođavanje ispitih tehnologija za provođenje postupka kvalifikacionog testiranja na osnovu dostavljenog mišljenja ljekara i nadležne medicinske ustanove.

### **POGLAVLJE III. STRUKTURA KVALIFIKACIONOG TESTA**

#### **Član 16.**

##### **(Sadržaj kvalifikacionog testa)**

- (1) Kvalifikacioni test sa ispitnim zadacima generira se elektronski iz baze ispitnih zadataka po metodi slučajnog odabira, najranije 24 sata prije održavanja kvalifikacionog testa.
- (2) Kvalifikacioni test se sastoji od ukupno 100 ispitnih zadataka.
- (3) VSTV BiH će osigurati da kvalifikacioni test za kandidate koji su se prijavili za istu poziciju u okviru jednog ispitnog termina, sadrži iste ispitne zadatke.
- (4) Ispitni zadaci mogu se postavljati na jednom od jezika i pisama u službenoj upotrebi u BiH.
- (5) VSTV BiH donosi Uputstvo kandidatima za polaganje kvalifikacionog testa koje se objavljuje na web stranici VSTV-a BiH i na web portalu pravosudje.ba.

#### **Član 17.**

##### **(Dizajn kvalifikacionog testa)**

- (1) Dizajnom kvalifikacionog testa određuju se ciljevi kvalifikacionog testiranja i definiraju se oblasti iz kataloga ispitnih zadataka koje će se testirati.
- (2) Stalna komisija utvrđuje odvojen dizajn testa za kandidate koji se prijavljuju na poziciju sudije odnosno dizajn testa za kandidate koji se prijavljuju na poziciju tužioca.
- (3) Dizajn testa utvrđen nakon stupanja na snagu ovog pravilnika vrijedi dvije godine, izuzev ukoliko Stalna komisija ne donese drugačiju odluku.

#### **Član 18.**

##### **(Testiranje kandidata prijavljenih na obje pozicije)**

Ukoliko se kandidat prijavi i na poziciju sudije i na poziciju tužioca, u sudovima odnosno tužilaštvima navedenim u članu 5. stav 1. ovog pravilnika, kvalifikaciono testiranje obavlja se za obje pozicije.

#### **Član 19.**

##### **(Održavanje i trajanje kvalifikacionog testa u elektronskoj formi)**

- (1) Kvalifikacioni test traje 100 minuta.
- (2) Predviđeno vrijeme za izradu testa računa se automatski od momenta označavanja početka testa. Kandidat tokom cijelog testa ima uvid u preostalo vrijeme za izradu testa.
- (3) Kvalifikacioni test završava u slučaju kada kandidatu automatski istekne vrijeme za izradu testa odnosno kada kandidat adekvatnom radnjom na računaru označi završetak testa.
- (4) Nakon isteka vremena za izradu testa odnosno potvrde završetka testa, kandidat nije u mogućnosti ponovo pristupiti testu.
- (5) U slučaju tehničkih problema sa aplikacijom za testiranje ili drugih vanrednih okolnosti, kandidat ima pravo da mu se nadoknadi izgubljeno vrijeme.

(6) Ukoliko ne postoje tehničke mogućnosti završetka već započetkog kvalifikacionog testa iz razloga navedenih u stavu 5. ovog člana, isto će biti evidentirano u zapisnik i kandidatu će biti omogućeno da ponovo pristupi kvalifikacionom testu.

#### **Član 20.**

##### **(Provođenje kvalifikacionog testa u štampanoj formi)**

(1) Neposredno prije početka testa u štampanoj formi Odjel za imenovanja odštampat će automatski generirane testove za svakog kandidata i iste spremi u zatvorene koverta.

(2) Odštampani testovi u zatvorenim kovertama podijelit će se kandidatima u prostoriji u kojoj se održava testiranje.

(3) Kandidat u zaglavlje testa unosi automatski generiranu identifikacionu šifru i datum izrade testa.

(4) Po završetku testiranja, testovi u zapečaćenim kovertama čuvaju se na odgovarajućem mjestu u prostorijama Odjela za imenovanja, te dostavljaju Stalnoj komisiji na ocjenjivanje.

(5) Pravila koja se odnose na provođenje testiranja u elektronskoj formi shodno se primjenjuju na provođenje testiranja u štampanoj formi.

#### **Član 21.**

##### **(Ocjenjivanje kvalifikacionog testa)**

(1) Ocjenjivanje kvalifikacionog testa u elektronskoj formi vrši se automatski, dok ocjenjivanje kvalifikacionog testa u štampanoj formi vrši Stalna komisija.

(2) Svakom tačno odgovorenem ispitnom zadatku dodjeljuje se jedan bod.

(3) Ukupno se na kvalifikacionom testu može ostvariti 100 bodova.

(4) Kandidat koji je na kvalifikacionom testu ostvario manje od 70 % od ukupnog broja bodova nije položio test.

(5) Uspjeh na kvalifikacionom testu izražava se ocjenom.

(6) Skala ocjenjivanja sadrži pet ocjena:

- a) nedovoljno (1): znanje ne ispunjava minimalne kriterije,
- b) dovoljno (2): znanje ispunjava minimalne kriterije,
- c) dobro (3): dobro znanje,
- d) vrlo dobro (4): natprosječno znanje,
- e) izvrsno (5): izuzetno znanje.

(7) Ocjena kvalifikacionog testa se utvrđuje na osnovu postignutog broja bodova u odnosu na broj bodova iz stava 3. ovog člana, prema slijedećem kriteriju:

- a) kandidat koji na kvalifikacionom testu ostvari manje od 70% bodova od ukupnog broja bodova ocjenjuje se ocjenom nedovoljno (1) i nije položio test,
- b) kandidat koji na kvalifikacionom testu ostvari između 70% i 77% bodova od ukupnog broja bodova ocjenjuje se ocjenom dovoljno (2),
- c) kandidat koji na kvalifikacionom testu ostvari između 78% i 85% bodova od ukupnog broja bodova ocjenjuje se ocjenom dobro (3),
- d) kandidat koji na kvalifikacionom testu ostvari između 86% i 93% bodova od ukupnog broja bodova ocjenjuje se ocjenom vrlo dobro (4),
- e) kandidat koji na kvalifikacionom testu ostvari između 94% i 100% bodova od ukupnog broja bodova ocjenjuje se ocjenom izvrsno (5).

(8) Po završetku testa, kandidatu će se na ekranu ispisati prelimanarni rezultat kvalifikacionog testa koji sadrži broj postignutih bodova i uspjeh na kvalifikacionom testu koji sadrži ocjenu kvalifikacionog testa.

(9) Kandidat koji ne položi kvalifikacioni test neće biti pozvan na razgovor.

#### **Član 22.**

##### **(Obavještenje o rezultatima kvalifikacionog testiranja)**

(1) Odjel za imenovanja obavještava kandidate o zvaničnim rezultatima kvalifikacionog testa najkasnije u roku od osam dana od dana održavanja testa.

(2) Lista kandidata sa ostvarenim ocjenama odnosno bodovima, uključujući i kandidate koji nisu ostvarili zadovoljavajući uspjeh, objavljuje se na zaštićenom dijelu internet stranice Vijeća i dostupna je samo kandidatima koji su učestvovali u konkursnoj proceduri.

(3) Obavještenje o rezultatima testa sadrži identifikacione šifre kandidata i ostvoreni rezultat.

#### **Član 23.**

##### **(Vremensko važenje ostvarenog rezultata)**

(1) Kandidat koji je položio kvalifikacioni test ima pravo u okviru narednog javnog konkursa ponovo pristupiti kvalifikacionom testiranju, s tim što se u tom slučaju kandidatu uzima u obzir uspjeh ostvaren na kvalifikacionom testu u okviru tog konkursa, dok se svi prethodni rezultati poništavaju.

(2) Kandidat koji nije položio kvalifikacioni test ima pravo ponovo pristupiti kvalifikacionom testu nakon proteka 6 mjeseci od dana polaganja kvalifikacionog testa. Ukoliko kandidat ne položi kvalifikacioni test dva puta uzastopno, nema pravo pristupiti kvalifikacionom testu u periodu od godinu dana od dana zadnjeg polaganja testa.

#### **Član 24.**

##### **( Uvid u ostvoreni rezultat kandidata)**

Odgovarajuća Komisija za obavljanje razgovora sa kandidatima, odnosno Podvijeće za predlaganje kandidata neće imati informaciju o ostvarenom rezultatu kandidata na kvalifikacionom testu prije nego što se ocjene svih članova komisije o obavljenom razgovoru sa kandidatom, dostave nadležnom podvijeću VSTV-a BiH za predlaganje kandidata.

#### **Član 25.**

##### **(Zapisnik o provedenom kvalifikacionom testiranju)**

(1) O svakom provedenom kvalifikacionom testu osoblje Odjela za imenovanja sačinjava zapisnik koji obavezno sadrži:

- a) mjesto i datum održavanja kvalifikacionog testa,
- b) imena kandidata koji su pozvani na kvalifikaciono testiranje i imena kandidata koji su pristupili testiranju,
- c) ime kandidata sa diskvalificiranog testa i razloge diskvalificiranja,
- d) sve druge informacije i važnije radnje vezano za sam postupak provođenja kvalifikacionog testa.

(2) Zapisnik sačinjava i potpisuje zaposlenik Odjela za imenovanja koji prisustvuje testiranju a potpisuje ga i član Stalne komisije zadužen za nadzor nad provođenjem kvalifikacionog testa.

(3) Zapisnik o provedenom kvalifikacionom testu se dostavlja odgovarajućem podvijeću VSTV-a BiH za predlaganje kandidata, nakon obavljenog razgovora sa kandidatima i dostavljenih ocjena sa razgovora za sve kandidate.

#### **Član 26.**

##### **(Nadzor nad provođenjem kvalifikacionog testiranja)**

(1) Nadzor nad provođenjem kvalifikacionog testiranja vrši osoblje Odjela za imenovanja i Stalna komisija.

(2) Prostorijama za testiranje i kvalifikacionom testu mogu pristupiti samo kandidati sa liste navedeni u obavještenju o održavanju kvalifikacionog testa, osoblje Odjela za imenovanja i član Stalne komisije zadužen za nadzor.

### **POGLAVLJE IV. BAZA ISPITNIH ZADATAKA**

#### **Član 27.**

##### **(Vođenje baze ispitnih zadataka)**

(1) VSTV BiH putem Odjela za imenovanja vodi elektronsku bazu ispitnih zadataka iz koje će se generirati kvalifikacioni testovi za kandidate.

(2) Baza ispitnih zadataka omogućava automatsko generiranje kvalifikacionih testova za kandidate u skladu sa odredbama člana 16. ovog pravilnika.

#### **Član 28.**

##### **(Sadržaj baze ispitnih zadataka)**

(1) Baza ispitnih zadataka sadrži ispitne zadatke iz oblasti navedenih u članu 7. ovog pravilnika, a koji su izrađeni od strane stručnjaka koje odredi VSTV BiH.

(2) Stalna komisija je obavezna redovno ažurirati bazu ispitnih zadataka.

#### **Član 29.**

##### **(Pristup bazi ispitnih zadataka)**

(1) Bazi ispitnih zadataka može pristupiti samo zaduženo osoblje Sekretarijata VSTV-a BiH i članovi Stalne komisije.

(2) Izuzetno od odredaba stava 1. ovog člana, bazi ispitnih zadataka mogu pristupiti i druge osobe na osnovu obrazložene odluke Stalne komisije.

(3) Svaki pristup bazi ispitnih zadataka automatski se evidentira uz bilježenje podataka o korisniku koji je pristupio bazi, datumu i vremenu pristupa, te obavljenim radnjama.

(4) Informacija o neovlaštenom pristupu bazi ispitnih zadataka dostavlja se Stalnoj komisiji.

### **POGLAVLJE V. PRAVILA PONAŠANJA I DISKVALIFICIRANJE SA KVALIFIKACIONOG TESTA**

#### **Član 30.**

##### **(Pravila ponašanja tokom kvalifikacionog testa)**



(1) U prostoriju određenu za održavanje testa nije dozvoljeno unošenje mobitela, laptopa, kamera, slušalica, uređaja za snimanje ili bilo kakvih elektronskih uređaja, pisanih materijala, ručnih torbi, novčanika, tašni, ruksaka, pribora za pisanje i drugih sličnih predmeta.

(2) Nakon označavanja početka testa nije dozvoljeno postavljanje bilo kakvih pitanja odnosno davanje komentara, te međusobna komunikacija kandidata.

(3) U pravilu, nije dozvoljen izlazak iz prostorije za održavanje testa nakon označavanja početka testa.

(4) U izuzetnim slučajevima kandidat može napustiti prostoriju u kojoj se vrši testiranje u pratnji osobe koja vrši nadzor nad testiranjem, s tim da se vrijeme predviđeno za izradu testa ne nadoknađuje.

### **Član 31. (Održavanje reda)**

Tokom testiranja kandidati su dužni poštovati red, te načela pristojnog i uljudnog ponašanja.

### **Član 32. (Diskvalificiranje sa testa)**

(1) Ponašanje suprotno pravilima utvrđenim članovima 30. i 31. rezultirat će diskvalificiranjem kandidata sa testa.

(2) Kandidat koji je diskvalificiran sa kvalifikacionog testiranja, smatrat će se da nije položio test.

(3) U slučaju diskvalificiranja kandidata sa kvalifikacionog testa prouzrokovanog povredama pravila iz člana 30. i 31. ovog pravilnika, Stalna komisija može donijeti odluku kojom se tom kandidatu zabranjuje pristup kvalifikacionom testu u periodu od godinu dana od učinjene povrede.

## **POGLAVLJE VI. TAJNOST I POVJERLJIVOST**

### **Član 33. (Zaštita podataka u postupku testiranja)**

(1) Osoblje Sekretarijata VSTV-a BiH i Stalna komisija dužni su obezbijediti tajnost i povjerljivost podataka o kandidatima u procesu kvalifikacionog testiranja kandidata.

(2) Osoblje Odjela za imenovanja zaduženo je da obezbijedi tajnost:

- ličnih podataka kandidata koji su pristupili kvalifikacionom testiranju,
- identifikacionih šifri,
- verifikacionih šifri i
- podataka o konačnim rezultatima testa kandidata.

(3) Odjel za IKT zadužen je da preduzme tehničke mjere koje sprečavaju neovlašten pristup podacima ostvaren elektronskim putem.

(4) Tajnost podataka u vezi sa kandidatima koji su pristupili kvalifikacionom testiranju i rezultatima kvalifikacionog testa prestaje nakon što se ocjene svih članova komisije o obavljenom razgovoru sa kandidatom, dostave nadležnom podvijeću VSTV-a za predlaganje kandidata.

(5) O svim pokušajima narušavanja tajnosti podataka iz člana 24. i člana 28. ovog pravilnika obavještava se Stalna komisija.

**Član 34.**  
**(Odgovornost za otkrivanje podataka)**

Osoblje Sekretarijata VSTV-a BiH i član Stalne komisije koji namjerno ili iz grube nepažnje omogući otkrivanje podataka iz člana 28. i člana 33. stav 2. ovog pravilnika snosi odgovarajuću disciplinsku odgovornost.

**POGLAVLJE VII. PRAVO PRIGOVORA**

**Član 35.**  
**(Pravo prigovora na postupak kvalifikacionog testiranja)**

(1) Kandidat koji smatra da je došlo do povrede regularnosti postupka kvalifikacionog testiranja može podnijeti prigovor Stalnoj komisiji.

(2) Prigovor se može podnijeti u roku od tri dana od dana objave obavještenja o održavanju kvalifikacionog testa na web stranici VSTV-a BiH i web portalu pravosudje.ba, odnosno u roku od tri dana od objave rezultata kvalifikacionog testa na web stranici VSTV-a BiH i web portalu pravosudje.ba.

**POGLAVLJE VIII. VOĐENJE EVIDENCIJA**

**Član 36.**  
**(Evidencija o osobama koje su pristupile kvalifikacionom testiranju)**

(1) VSTV vodi evidenciju osoba koje su pristupile kvalifikacionom testu.

(2) Evidenciju vodi Odjel za imenovanja u elektronskoj formi i sadrži osobne podatke kandidata, identifikacionu šifru kandidata i ostvareni uspjeh na testu, te odgovore kandidat na svako pojedino pitanje.

(3) Evidencija se vodi odvojeno za svaku kalendarsku godinu i zaključuje se posljednjeg radnog dana u godini.

(4) Kandidat ima pravo da mu se na pismeni zahtjev omogući uvid u podatke navedene u stavu 2. ovog člana u prostorijama VSTV BiH.

(5) Podaci iz evidencije čuvat će se trajno.

**POGLAVLJE IX. PRELAZNE I ZAVRŠNE ODREDBE**

**Član 37.**  
**(Testni period)**

(1) U periodu od 01. maja do 01. decembra 2013. godine VSTV BiH će provoditi testiranje postupka kvalifikacionog testiranja kandidata.

(2) U periodu navedenom u stavu 1. ovog člana neće se primjenjivati odredbe člana 17. stav 3., člana 21. stav 9., te člana 23. ovog pravilnika.

(3) Polaganje kvalifikacionog testa obavezno je za sve kandidate koji se prijavljuju na pozicije navedene u članu 5. stav 1. ovog pravilnika.

(4) Rezultat kandidata ostvaren na kvalifikacionom testiranju u periodu navedenom u stavu 1. ovog člana, neće biti odlučujući prilikom imenovanja na pozicije nosilaca pravosudnih funkcija u pravosuđu BiH.

(5) Stalna komisija ima mogućnost da za svako kvalifikaciono testiranje koje se provodi za pojedini javni konkurs utvrdi odgovarajući dizajn kvalifikacionog testa.

(6) Na razgovor će biti pozvani samo oni kandidati koji su polagali i završili kvalifikacioni test.

**Član 38.**  
**(Stupanje na snagu)**

Ovaj pravilnik stupa na snagu 8 dana od dana objavljivanja u „Službenom glasniku Bosne i Hercegovine“.

Broj: 04-02-1572/2013  
Sarajevo, 09.04.2013. godine

Predsjednik  
Milorad Novković

